





* * * * *


* FORT *



* HILL *

* * * * *





Le Thëa-

T'RE DES BONS EN-
gins, auquel sont contenuz cent Em-
blemes moraulx. Composé par Guil-
laume de la Perriere Tolosain:

Et nouvellement par icez
luy limé, reueu, &
corrigé.

Auecq' priuilege.

De l'imprimerie de Denys Ianot,
imprimeur, & libraire.



A monsieur le preuost de Paris,
ou son Lieutenant Ciuil.



Supplie humblement Denys Ianot,
libraire, & imprimeur, demourant à
Paris. Comme ainsi soit que ledict
suppliant ayt recouuert vne petite copie gar-
nie de cēt figures, & cēt dixains, appelée: Le
Théatre des bons engins, cōposé par discrete
personne Guillaume de la Perriere Tolosain,
lequel Theatre il feroit voluntiers imprimer,
ce qu'il ne veult faire sans vostre permission,
licence, & congé: Ce considéré, il vous plaise
permettre audict suppliant le faire imprimer,
& vendre. Et au moyen que ledict suppliant
a frayé, & deboursé plusieurs deniers à la
taille des figures, & pourtraictz d'icelles, &
qu'encores il luy conuient faire pour les im-
pressiōs: il vous plaira permettre audict sup-
pliant defenses estre faictes à tous libraires,
& imprimeurs, & aultres, d'imprimer, ven-
dre ne faire vendre desdictz liures, aultres

que ceulx que lediēt suppliant aura fait im-
primer, iusques à quatre ans finis, & accom-
plis: sur peine de confiscation desdiētz liures
qu'ilz auroient imprimez, ou fait imprimer,
& vendus, & d'amende arbitraire. Et vous
ferez bien.

Soit fait, ainsi qu'il est requis, ius-
ques à trois ans prochainement ve-
nans. Faiēt le dernier iour de Ian-
uier, mil cinq cents trente neuf.


I. I. de Mesmes.

A ij



[Faint, illegible text within a rectangular frame, possibly bleed-through from the reverse side of the page.]





Epistre.

A treshaulte, &
trefillustre prin-

cesse, madame Marguerite de France, Roy-
ne de Nauarre, sœur vnique du tref-
chrestien Roy de France: Guil-
laume de la Perriere, son
treshumble seruiteur.

A iij





MA dame, le Philosophe Senèque Stoïque
(auquel sans aucune controuerse, les
doctes attribuēt, entre les philosophes
latins, la principaulté de morale philosophie)
dit en petites paroles, pleines de grande sub-
stance: Que Fortune n'est iamais en repos. Et
d'auãtaige: Qu'elle n'est coustumiere de don-
ner ioye sans tristesse, douceur sans amertu-
me, repos sans trauail, renommée sans enuie, &
generalemēt aucune felicité sans infortune,
ce que i'apperçoy en moy à presēt verifié. Car
d'autāt qu'elle m'a rēdu ioyeux, en me donnāt
opportunité de faire treshumble reuerence à
vostre royalle maiesté, & veoir toute nostre
citē illustrée de vostre tāt desirée venue: de ce
qu'elle à bastée icelle, elle m'a rēdu grādemēt
marry, & fasché, ne me dōnant loysir de pre-
parer, limer, & pfaire selon ma deliberation,
cēt Emblemes, avec aultāt de dixains declara-
tifz, & illustrez d'iceulx. Lesquelz des leur
invention, & commencement sont à vous seule
tresillustre princesse, par moy vostre hum-

ble, & petit seruiteur (telz qu'ilz sont) consacrez, & dediez. Mais à celle fin (ma dame) que vostre maiesté ne me puisse inculper, d'autant que suyuant l'erreur des Gentilz Etheniques, i' attribue à Fortune ce, que (comme Chrestien escripuant à princesse Chrestienne) ie doibs attribuer à prouidence diuine: l'estime que celle vostre venue ne dependit oncq' de Fortune, ains (ainsi que font tous aultres actes, & negoces humains) de seule prouidence diuine. Laquelle (comme il est necessaire de croyre) fait toutes choses pour le mieulx, & que consequemmēt, vostre heureuse venue n'a esté vers moy hastiue que pour le mieulx. Parquoy (tres illustre princesse considerant à par moy ce que dessus, me suis enhardy de vous presenter humblement mesdictz Emblemes: combien qu'ilz n'ayent atteinēt que iusques au demy du nombre pretendu. Vous pryant (Ma dame) les vouloir telz qu'ilz sont) receuoir selon vostre benignité accoustumée: & de tel vouloir, comme

par moy vostre petit seruiteur vous sont offertz, & presentez. Au surplus (Ma dame) ce n'est pas seulement de nostre temps, que Emblemes sont en bruiet, prix & singuliere veneration: ains c'est de toute ancienneté, & presque des le commencement du monde. Car les AEgyptiens, qui se reputent estre les premiers hommes du monde, auant l'vsaige des lettres, escriuoient par figures & ymages, tant d'hommes, bestes, oyseaulx, & poissons, que serpents: par icelles exprimant leurs intentions, comme recitent tres anciens auteurs, Cheræmō, Orus, Apollo, & leurs semblables, qui ont diligemment & curieusement trauaillé à exposer & donner l'intelligence desdictes figures Hieroglyphiques. Desquelles semblablement, Lucan a fait mention en sa Pharsalie: & des modernes, l'auteur Polyphile en la description de son songe: Celien Rodigien en ses commentaires des elections anticques. Alciat a pareillement de nostre temps, redigez certains Emblemes & illustrez de vers

latins. Et nous, à l'imitation des auant nom-
mez, penserons auoir bien employé & collo-
qué les bonnes heures, à l'inuention & illu-
stration de nosdictz presents Emblemes: &
nous reputerons tresheureux, si la lecture
d'iceulx vous peult donner quelque honnesté
recréation. Priant Dieu, tresillustre princef-
se, qu'il vueille longuement conseruer vostre
saine, & bonne pensée, en corps sain.








Huiſtain.

Pierre du Cedre Tolosain, à l'auteur
du preſent liure:

Comme le feu, qui commence allumer,
Eſt vn bien peu preſſé de la fumée:
Semblablement enuie a fait fumer
Par cy deuant, ta bonne renommée.
Mais à preſent ſera bien allumée,
Par le moyen de ton diuin ouuraige:
Et la lueur en brief temps eſtimée,
Par deſſus tous bons eſpritz de noſtre aage.








I.
Embleme.

LE dieu Ianus iadis à deux visaiges,
Noz anciens ont pourtraict, & tracé:
Pour demonstrier que l'aduis des gëts saiges,
Vise au futur, aussi bien qu'au passé.
Tout temps doibt estre en effect compassé,
Et du passé auoir la recordance,
Pour au futur preueoir en prouidence,
Suyuant vertu en toute qualité.
Qui le fera verra par euidence,
Qu'il pourra viure en grand' tranquillité.








II.

LE dieu Bacchus en allant à la chasse
Trouua Venus, & la vint embrasser:
Puis la pria qu'il luy pleust, de sa grace,
L'accompaigner, & quant & luy chasser.
Lors d'un accord pour mieulx le tēps passer
Tous leurs filetz allerent si bien tendre,
Qu'incontinent Minerue s'y vint prendre,
Voyre si bien qu'elle n'eut onc passaige,
Pour s'en fuyr. Ce que nous fait entendre,
Que vin, & femme, attrapent le plus saige.







III.

TOy qui ueulx uiure au seruice des prin-
Garde toy bien de te iouer à eulx: (ces,
Car pour petit, ou pour rien que les pinces,
Tu trouueras leur ieu trop dangereux.
Telz passetemps, sont en fin douloureux,
Et bien souuent grãd malheur s'en reueille.
Pour te iouer, cherche bille pareille,
Par ce moyen seras hors de danger:
Qui de touzer le Lyon s'appareille,
Est en peril de se faire menger,

B







IIII.

L A mouche au laiçt retourne, si souuent,
Qu'à la parfin elle y laisse la uie.
Fol en plaisir s'esgare, si auant,
Qu'à la parfin de son chemin desuie:
Car uolupté, qui les humains conuie
A son festin, pour leur liurer malheur,
Pour tout guerdon, ilz n'en ont que douleur,
Larmes & pleurs font la fin de la dance.
Qui se uouldra garder de sa chaleur,
Euitera mortelle decadance.

B ii







V.

Qui prend le bond, & laisse la uolée:
Ne fut iamais tenu pour bon ioueur.
Qui prend le mont, & laisse la uallée:
Ne fut iamais tenu pour bon coureur.
C'est grand abuz de laisser son bon heur,
Pour un espoir de promesse incertaine:
Car mespriser une chose certaine,
N'est pas le faict d'un saige entendement.
Folle entreprinse, & gloire trop haultaine,
Font tomber l'homme en maint encõbrement.

B iij







V I.

MAsques seront, cy apres, de requeste,
Autāt, ou plus qu'elles furēt iamais.
Quand l'on souloit faire banquet, ou
L'on en usoit p forme d'entremetz. (feste,
Cheres seront par force desormais:
Car, à present, n'est homme qui n'en use,
Chascun ueult faindre & colorer sa ruze,
Trahyson gist soubz beau & doulx lägaige.
Merueille n'est si tout le monde abuze:
Car chascun tend à faulcer son uisaige.

B iiii









VII.


LE feu de glaiue attiser ne conuient,
Comme l'on ligt au diët Pitagorique:
Lequel, ainsi que le propos aduient,
Sera reduiët en sens alegorique.
Ce beau pourtraict clairemēt nous explique
Que gents irez ne deuons irriter:
Ains, que plustost, les deuons inuiter
A bonne amour, par douceur de parole:
Car, aultrement, l'on les fait conciter,
Et enflammer plus fort, leur chaulde cole.





VIII.

Pitagoras, au surplus, defendoit
A tout humain, son propre cœur mäger.
Par ce propos (ce dit on) entendoit,
Que, pour angoisse, on ne doibt estranger
Soy, de soy mesme: ains soy uaincre & réger,
Ou aultrement ce luy est grand' simplesse,
De se uouloir consumer, par tristesse,
En lieu de mettre à soulas son estude:
Car chose n'est qui plus tost nous oppresse,
Que uiure en soing, dueil & sollicitude.








IX.

CE mesme auteur, dit en un aultre endroit
Que c'est à l'homme une grande folie,
Mettre en son doigt un anneau trop estroit.
Car ce faisant trop sottement folie.
Le plus souuent le fol soy mesme lye,
Et pour trouuer heur & béatitude,
Laiſſant franchise, il entre en seruitude.
Ce que ne fait, ne fait oncq' homme saige:
Ains, en usant tousiours de fortitude,
Fuyt tât qu'il peult de se mettre en seruaige.









X.

DIt d'aduantaige, un motet d'exellence,
C'est, Que sur tout se doibuent les hu-
Cõtregarde de passer la balãce, (mains
Suyure le poix iuste, ne plus ne moins.
Et qu'ainsi soit, les monarques Romains
Furent heureux soubz le poix de iustice.
Mais puis que uint, en leur cœur, auarice,
Et contre droit furent gras & refaietz,
Discord ciuil les meit en telle lice,
Que de leurs maïs mesmes se sont deffaietz.







XI.

BAiller la main ne cōuient, à tout hōme,
Ne faire amy auant que l'esprouer:
Car l'on s'en peult bien repentir, en somme,
Lors que le temps n'est de le reprouuer.
Auāt qu'on uueille, hōme estrāge approuuer
Auoir il fault consideration
Sur son lignage, & sur sa nation,
Quelz mœurs il ha, quelle facon de uiure.
Qui fait amy, par folle affection,
Sans grand danger ne s'en uerra deliure.

C







XII.

Pourquoy uoit on un hōme en sa ieunesse
Estre hazardeux, & chauld, plus qu'il
ne fault?

Et l'homme d'aage, affoibly par uieillesse,
Est fort crainctif, & froid en tout assault?

La raison est, car le ieune à deffault
D'experience: & pourtant, il luy semble
Que qui le uoid deuāt luy, fault qu'il trēble,
Tant se confie en son sens trop hastif.

Le uieil a ueu tant de malheur ensemble,
Que par raison il doibt estre crainctif.

C ij








XIII.

EN Thessalie on uoit communement,
Asnes refaiçtz & de grand corpulëce:
Qui toutesfoys sont lourdz au mouuement,
Et n'ont en eulx que du corps l'excellence.
Ores en ha, par tout, en habondance:
Car maïtz lourdaux asniers à testes grosses,
En plusieurs lieux, portët mitres & crosses,
Et les cheuaulx fault que portent les bastz:
Puis qu'Asnerie, & Dignité font nopces,
Gents Literez cherchez ailleurs esbatz.

C iij







XIIII.

Pour peu de cas trebusche foy legiere
Et pour un rien soubdain à mont se lance:
Vne plumette, un grain de cheneuiere,
Plus poysera, contre elle, à la balance.
Garder nous fault, que n'ayons accointance
A gents, qui sont amys, selon fortune.
Vraye amytié, tousiours est opportune:
Et se cognoist en temps d'aduersité.
Les bons amys (selon la uoix commune)
Ne sont cogneuz, qu'à la necessité.

C iij








XV.

PAinctre uoulant estre trop curieux,
A faconner tant de fois son ymaige:
Par trop cuyder faire de bien en mieulx,
En fin pourroit bien gaster son ouuraige.
Au cas pareil, l'esprit leger, uolaige,
Par trop cuyder blasonner, & scauoir:
Souuent se pert, & n'en peult on auoir
A l'aduenir, que bien peu d'esperance.
Mieulx d'ocques uault saict Paul rameteuoir
Qui dit, Qu'on doibt scauoir à suffisance.









XVI.

L'On a, iadis, ueu mōstres biē horribles:
Cōme Chimere en forme espouentable,
Sagittaire, & Centaures fort terribles,
Et Gerion en trois corps admirable.
Phiton, serpent, fut crainct, & redoubtable,
Meduse fut en son poil trop hideuse,
Hydra difforme en Lerne dangereuse,
Et Cerberus (à ueoir) horrible beste:
Mais bien seroit chose plus merueilleuse,
Qui pourroit ueoir une femme sans teste,










XVII.

ENtre pourceaulx l'ordure, & la fiante
Plus est en prix que baulme precieux.
Et entre aulcuns, une chose meschante,
Est exaulcée au dessus des neuf cieulx.
Vn idiot, infame, uicieux,
N'estime rien bonne literature,
Car il bait gents scauants, de sa nature,
Et n'ayme rien, que se ueault rer en fange.
Tant que pourceaulx aymeront la pasture,
Gents literez auront temps, fort estrange.








XVIII.

EN tel estat que uoyez, noz ancestres,
Dame Venus, iadis uoulurent paindre.
Biẽ cognoist on, que les souuerains maistres
En la faisant, ne se uoulurent faindre.
Et pour l'effet du sens mistique attaindre,
Par la Tortue, entendre est de besoing,
Que femme hõneste aller ne doibt pas loing
Le doigt leuẽ, qu'à parler ne s'auance.
La clef en main, denote qu'auoir soing
Doibt sur les biens du mary, par prudence.







XIX.

LA rose sort de l'espine picquante,
Combien que soit souueraine en ualeur:
L'espine est aspre, à douleur prouoquante,
La rose est douce, excellente en odeur.
Cecy demonstre à tout honneste cœur,
Qu'apres labeurs, soulcyz, peines, trauaulx
Prins à l'estude, avec dix mille maulx:
Lesquelz fault prendre en bonne patience,
Pour consumer & finir telz trauaulx,
Viët le doux fruiët, que l'on nôme Science.

D







XX.

Gents auenglez, mal conduictz par
Fortune,
Considerez qu'elle ha les yeulx bendez:
Non plus que uous, n'y uoid soleil ne lune,
Ie ne scay pas comme uous l'entendez.
A quoy tient il, que ne uous debendez?
Si uerrez bien comme mal uous promene,
Et le pertuys, ou trebuscher uous meine,
Gouffre de maulx, & de calamité:
Quand penserez auoir or, & domaine,
Lors uous uerrez en grande extremité.

Dij







XXI.

Q Vi porte espée, estant oingte de miel,
 Mōstre qu'il est du rāg des hipocrites
 Qui soubz douceur tiennent caché leur fiel
 En euidance, un iour, seront reduictes
 Leurs faulsetez, & cautelles mauldiètes:
 Car tel uerra, qui oncques n'a eu ueuë.
 Leur espée est bien tranchante, & aguë,
 Qu'ilz ont uoulu, en ce poinct, de miel oing-
 Ce nonobstant, une mouche menuë, (dre,
 Ne lairra pas à les asprement poingdre.

D iij







XXII.

LE Lyon est de cœur, & de stature,
Fort & puisſāt, noble, uailłāt & preux.
Le Regnard est, de sa propre nature,
En tous endroiētz, subtil, & cauteleux.
Le prince doibt ressembler à tous deux,
Se triumpber ueult par mer & par terre:
En ce faisant, il peult grād bruyt acquerre,
Et meriter un honneur non pareil:
Mōstrer se doibt (cōme uray chef de guerre)
Lyon en force, & Regnard en conseil.

D iij









XXIII.

Souuent pescheurs cuydent prendre un
Perche,

Et soubz leurs retz treuent un Scorpion.
Tel, royne, & roc pour prendre, en iouant
Lequel en fin n'ëpoigne qu'un piö. (cherche
Souuent on uoid un foible champion,
Qui cuyde bien un Hercules combatre:
Mais quãd ce uient sur le poinct de se barre,
Tant s'esbahist, que tout son sens luy fault.
Tout bon esprit, pour maint danger abatre
Ne doibt iamais cuyder, plus qu'il ne fault.









XXIII.

Pensez si c'est chose tresbien seante
A un pourceau, de porter une bague.
Pensez si c'est chose bien conuenante
A un enfant, de porter une dague:
A un coquin, de mener grosse braue:
A un lourdault, contrefaire le saige:
A un asnier, traicter subtil ouuraige:
A un gros bœuf, presenter des chapeaulx,
Propre doibt estre à chascun son paraige.
La bague à l'homme, & le gland aux pourceaulx.







XXV.

Q Vād on tient l'arc (plus qu'il ne fault)
tendu,

Aux bons efforts l'on le treuve inutile.

En ce pourtraict, s'il est bien entendu,

Du cas prendrons demonstrence facile:

A un chascun est chose difficile

De trauailler, sans prendre esbatement:


Compartir fault le temps condecemment,


Resocillant les esperitz lassez.

Qui ne le fait, aura finalement,

Tant corps qu'esperoir assoibliz, & cassez.









XXVI.

TOy, qui te bats à gêts forclos d'espoir,
Trop entreprēdz perilleuse bataille:
Car lors qu'ilz sont en instant desespoir,
Leurs corps, & uie estimēt moins que paille.
Tout bon uainqueur, aux uaincuz chemin
baille
Pour s'en fuyr, sans les uouloir presser.
Garde toy doncq' de trop les oppresser:
Car s'il aduient, qu'à les meurtrir t'esbates,
Tu les uerras contre toy, r'adresser,
Les yeulx bendez, comme les Andabates.









XXVII.

LE roy d'eschetz, pēdant que le ieu dure,
Sur ses subiectz ha grande preference:
Si l'on le matte, il conuient qu'il endure,
Que l'on le mette au sac, sans difference.
Cecy nous fait notable demonstrance:
Qu'apres le ieu de uie transitoire,
Quand mord nous ha mis en son repertoire,
Les roys ne sōt plus grād̄z que les uassaulx:
Car dans le sac (comme à tous est notoire)
Rois & pyons en honneur sont esgaulx.

E








XXVIII.

Ieu de Fortune, est tant impetueux
Que les plus haults, souuent elle renuerse:
Mais l'homme saige, en ses faictz uertueux,
N'est point subiect à sa fureur peruerse.
Car nonobstant qu'elle soit trop diuerse,
Contre uertu n'ha uigueur, ne puissance.
Par la Tortue en auons demonstrance,
Qui sur son corps porte cocque si dure,
Qu'elle ne crainct des mouches l'insolence:
Car, pour sa cocque, ont trop foible poin-
gture.

Eij








XXIX.

Plustost sera Fortune fauorable,
 A un dormart: à un roger bon temps,
 Qu'à un esprit gentil, & honorable,
 Qui trauaillé se sera cinquante ans.
 S'elle en ha fait, iadis, de mal contens,
 En cest estat: que fera desormais,
 Quand elle met (plus que ne fait iamais)
 Biens & honneurs aux filetz des dormãts?
 Et si ne chasse (à present) pour tout mes,
 Que pour paillardz, idiotz, ou gourmandz.

E iij








XXX.

Q Vi ueult la rose au uerd buysſõ saisir,
Esmerueiller ne se doibt s'il se poingt.
Grand bien n'auõs, sans quelque desplaisir:
Plaisir ne uient sans douleur, si appoinct.
Tout est meslé briefuement, c'est le poinct,
Qu'apres douleur, ou ha plaisir souuent:
Beau temps se uoid, tost apres le grand uent,
Grand bien suruiët apres quelque malheur.
Parquoy penser doibt tout homme scauant,
Que uolupté n'est iamais sans douleur.

E iij









XXXI.

EN danger est de rompre son espée,
Qui sur l'enclume en frappe rudement.
Aussi l'amour est bientôt sincoppée,
Quand son amy on presse follement.
Qui le fera, perdra subitement
Ce, qu'il deuroit bien cherement garder.
De tel abus, se fault contregarder,
Comme en ce lieu auons doctrine expresse.
A tel effort, ne te fault hazarder,
De perdre amy, quand souuent tu le presse.









XXXII.

L'Aigle ha le cœur de si noble nature,
Qu'elle ne ueult contre mouches con-
tendre.

Bien les pourroit mettre à desconfiture:
Mais ce faisant, hõneur n'ẽ scauroit prẽdre.
Tout bon esprit en cecy peult comprendre,
Que contre gents de cœur pusillanimes,
Ne font efforts les hommes magnanimes:
Mais aux pareilz taschent liurer la guerre.
D'auoir uaiçu gẽts de tous pointz infimes,
L'on n'ẽ pourroit, que deshõneur acquerre.










XXXIII.

Q Vi d'un rasouer la roche cuyde fẽdre,
N'auãce riẽ, fors que perdre son tẽps:
Et le filet du rasouer fin, & tendre,
Gaste du tout en maigre passetemps.
Sur ce notons, que noyses, ou contendz
Ne fault auoir, à gents plus forts que nous.
Le rasouer ha le taillant mol, & doux,
La roche est dure, & forte à l'aduantaige.
Contre plus forts (comme scauent bien tous)
L'on prẽd dẽbat, à son tresgrand dommaige.







XXXIII.


LE Rossignol, de nature, ha la grâce,
Que tous oyseaulx surmonte en har-
monie:



Tant se parforce à chanter, qu'il trespasse,
Pour ne uouloir que sa uoix soit honnie.

Maintz bons espritz ont telle felonnie,
Par le desir d'estre souuerains maistres,

Tant sont apres les proses, & les metres,
Et de scauoir ont si feruente enuie:

Que par uouloir trop se fonder aux lettrés;
Finablement ilz y perdent la uie.








XXXV.

EN uolupté facilement on entre:
Mais on en sort à grand difficulté.
Par trop uouloir obeyr à son uentre,
L'on en est pire en toute faculté.
Ce beau propos auons pour resulté,
Du Labyrinthe, auquel facilement
L'on peult entrer: mais si parfondement
On est dedans, l'yssue est difficile.
En uain plaisir aussi semblablement,
L'on entre tost: mais sortir n'est facile.

F







XXXVI.

Q Vi cuyde abatre abuz inueteré,
Est biẽ frustré de tout ce qu'il pour-
Car si souuent il est reiteré, (chasse:
Que l'on n'a rien à suyure telle chasse.
Fort fascheuse est, & bien sotte l'audace
De ceulx, qui ont ce lourd entendement,
De prendre aux retz les uentz aucunemēt:
Car tout ainsi que cela n'est possible,
Vn uieulx abus changer, semblablement,
Sans grand ennuy, on repute impossible.

Fij








XXXVII.

Lors que la dame au miroir se regarde,
Et qu'elle uoid la beaulté de sa face:
Fault que de uice en tant se contregarde,
Que deshonneur à sa beaulté ne face.
Si belle n'est, pour lors, fault qu'elle efface
Par ses uertus, le deffault de nature:
Beaulté de corps, tourne à desconfiture,
S'elle se plonge en plaisirs reprouuez.
Icy noter peult toute créature,
Que les miroirs à ces fins sont trouuez.

Fij








XXXVIII.

L'Oyseau captif, & mis dedās la caige,
Ne laisse pas, pour sa captiuité,
De iargonner en son beau chant ramaige,
Soy consolant sur toute aduersité.
Par cest exemple, estre doibt incité,
Tout triste cœur, à prendre esiouyssance:
Car à un mal, tristesse, & doleance,
Ne peult donner remede, ne secours:
Et si par dueil iamais rien on auance,
Fors que le terme, & la fin de ses iours.

F iij








XXXIX.

SI le Lyon conduict une bataille,
Posé qu'il n'ait avec luy que des Cerfsz:
Et d'aulture part vient un Cerf qui l'assaille,
Accompaigné de Lyons bien experts:
Le seul Lyon rendra les aultres serfsz,
D'aulture qu'un Cerf porteur estendart:
Car gents hardiz, ayants un chef couhard,
En combatant, n'auront iamais estime.
Et gents craintifsz se mettront en hazard,
S'ilz sont cõduictz par un chef magnanime.







XL.

LÉ grand larron tasche d'auoir office,
A celle fin que grands & petits ronge:
Tãdis qu'il prend, soubz couleur de iustice,
De le punir, le prince pense, & songe.
Puis tout soubdain, uient à serrer l'esponge,
En luy ostant le bien qu'il ha pillé.
Le larron est du pays exillé,
Decapité, ou, peult estre, pendu;
Trop peu seroit qu'il fut essorillé:
Car sur la roue, il doibt estre estendu.








XLI.

SI tu te metz à iouer à la paulme,
En te uoulant, pour passetemps, esbatre:
Ne pense pas que ton compaignon chaulme:
Car de sa part l'esteuf uouldra rabatre.
Penser aussi doibt tout homme folastre,
Que si par ieu quelque broquart prononcé,
Par ieu receoit la semblable responce,
Ne pour cela se doibt fort trauailler:
Car en bon poix on uend once pour oncé,
Pire ieu n'est que mocquer, ou railler.











XLII.

Simplicité, selon le temps qui court,
Est des meschants, réputée pour uice:
Et mesmement entre flateurs de court,
Qui sont plongez au gouffre de malice,
Vn homme simple est réputé pour nice.
Qui ne ueult estre aujourd'huy cauilleux,
Sera tenu pauvre, meschant pouilleux:
Pour se uestir n'aura ne draps ne linges.
Qui suyt la court, en ce temps perilleux,
Il sera l'Asne, estanz parmy les Cinges.







XLIII.

Vertu de bras fait uoguer la gallée,
Malgré des uëts, ses forces, & rëforts.
Ce que nous fait demonstrance assez claire,
De ceulx, qui ont les couraiges peu forts.
Si d'adventure on n'est par ses efforts,
Du premier coup paruenü, ou l'on tend,
Sans desespoir, osté ce qu'on pretend,
Par aultre ëdroit il fault qu'on y pouruoye:
Car qui ne peult uenir, ou il s'attend,
Par un costé, si cherche une aultre uoye.

G







XLIIII.

Communemēt l'on ne prēd les anguilles
Que parauāt n'ayt esté l'eau troublée.
Semblablement en querelles ciuilles,
Les fins larrons se font riches d'emblée.
Lors que par bruyt se fait mainte assemblée,
Pour meschās gents le tēps est plus propice.
Sedition estiment sacrifice,
Au monde n'est chose qui plus leur plaise.
En temps de paix, de concorde, & iustice,
L'homme meschant ne fait pas à son ayse.

Gij







XLV.

FLateurs de court, font par leur beau
deuis,
Pis mille fois, que ne font les corbeaulx:
Car le flateur deuore les corps uifz,
Contrefaisant propos mignons, & beaulx.
Mais le corbeau ne cherche les morceaulx,
Que sur corps morts, ou puante charongne.
Le faulx flateur, tousiours, le uif empoigne,
Pour à la fin le rendre pauvre, & mince:
De tel babil, & de si faincte troigne,
Se doibt garder le bon, & saige prince.

G ij







XLVI.

Q Vi l'os à l'asne, & au chië d'õne paille,
Monstre qu'il n'est pourueu de grand
saigesse:

Car ce qu'il fault à l'un, à l'autre baille,
En declairant sa folie, & simplesse.

Au temps present uoyons telle rudesse:

Car gents scauants, uiuent en indigence:

Les ignorants ont honneur, & cheuance,

Ce que deburoit estre tout le contraire.


Plus que iamais (c'est une grãd' meschance)

A pauureté doctrine est tributaire.

G iij








XLVII.

SI fort le Singe embrasse ses petitz,
Qu'en embrassant il leur liure la mort.
Maintz peres ont de si sotz appetitz
A leurs enfans, que grand malheur en sort.
Par les cherir de fole amour, trop fort
Dissimulant, souffrent leur insolence:
Et quand ilz sont sortiz d'aage d'enfance,
Et uenuz grandz, ilz sont incorrigibles:
Lors n'est pas tēps que l'on leur crie, & tēce
Quand ilz sont cheutz en accidēs terribles.









XLVIII.

Bacchus uoulant Hercules contrefaire,
Se reuestit de la peau d'un Lyon:
Mais il ne sceut si bonne troigne faire,
Que de brocardz il n'eust un million.
Il ne fault point, selon l'opinion
Des anciens, son naturel deffaire.
Le fol peult bien du saige contrefaire,
Mais qu'au parler ne se monstre estre sot:
Le foyble aussi peult bien du uaillant faire,
Et triumpber, quand on ne luy dit mot.







XLIX.

L'Araigne ha belle, & propre inuention,
Quãd sur sa toile elle attrape les mous-
Mais elle est foible, & n'a protectiõ, (ches:
Pour resister aux grosses, & farouches.
Au tẽps qui court, gros ne craignent les tou-
ches,
La loy n'ha lieu que sur pauvre indigence,
Les riches ont de mal faire licence,
Pauvreté n'ha iamais le uent à uoile.
Qu'ainsi ne soit, on uoid par euidencé,
Que grosse mousche abbat legiere toile.








L.

Qui donne uin à un febricitant,
Il ne le fait qu'eschauffer d'auãtaige:
Le uin est chauld, & la fiebure excitant,
Au patient il porte grand dommaige.
Semblablement le prince n'est pas saige,
Qui donne aux folz, dignitez, & offices:
Car par ce don augmentent leurs malices.
Et tant plus sont en haulte dignité,
Plus ont pouoir de faire malefices,
Au detriment de la communauté.







L I.

Pelerin laisse & femme, filz, & filles,
Parentz, amys, pour le pelerinaige,
A fin de vendre au peuple ses coquilles,
En leur monstrant enseigne, & tesmoignage,
Qu'ilz auröt fait aulcun loingtain voyaige,
Cuydät qu'un bië ilz ue sçauroiët acquerre,
Plus gräd qu'auoir couru par mer & terre:
Mais leur courir n'ha pas tousiours tenue.
Bourdon volant se doibt tenir en serre,
Et sur la fin, faire pas de Tortue.

H








LII.

A Grand regret, & piteux desconfort,
 L'Aigle se plainct, cōme mal fortunée,
 Quand d'une flescche on l'a frappée à mort,
 Laquelle fut de sa plume empennée.
 La personne est bien de mal'heure née,
 Qui de son mal donne l'occasion,
 Et qui cause est de sa destruction:
 Car d'un seul coup, double douleur reçoit.
 Avoir fault doncq' ceste discretion,
 D'oster de nous cela, qui nous deçoit.

Hij







LIII.

PEtite tache, ou macule en la face,
POn void plustost, que grãde sur le corps:
Le uisaige est ouuert en toute place,
Le corps caché n'est veu que par dehors.
Par ceste Embleme estre pouons recordz,
Qu'vn petit vice on vote plus au prince,
Que l'on ne fait vn grand en homme mince.
En bas estat, vices sont incogneuz.
Roys & seigneurs, en tout regne, ou prouïce
S'ilz sont meschãs, sont pröptemēt cogneuz.

H iij







LIIII.

QVād l'oyseleur veult beaucoup d'oy-
seaulx prendre,
Il faingt sa voix, avecq' quelque instrument,
Au son duquel vers luy se viennent rendre:
Par ce moyen les prend facilement.
Flateurs de court, font tout semblablement,
Pour attirer les princes en leurs laqs:
Car pour complaire, & leur donner soulas,
Cent fois le iour changent de contenance:
Mais quād le pŕice est cōtrainct dire: Helas,
Il est trop tard d'en auoir cognoissance.

H iij







L V.

A Vn cheual, soubdaï & tout d'vn coup,
Qui veult le poil de la queuë arracher,
Est temeraire, & n'auance beaucoup,
Car ne paruient à ce qu'il veult tascher.
A homme fol l'on fait son frain mascher,
Et ne paruient à son intention.
L'homme prudent en moderation,
Ce qu'il pretend, fait successiuement:
A l'homme fol precipitation,
Donne trauail, & peu d'auancement.










LVI.

Quand le Corbeau degloutit le Serpēt,
Au goust luy semble vn sucre, ou ve-
naison:

Mais puis après grandement s'en repent,
Car le bon goust, tost se tourne en poyson:
Il fault manger, & boyre par raison,
Et soy garder de suffocquer nature:
Car cil qui boit, & menge sans mesure,
Va de sa fin tousiours en approchant.
La gueulle fait plus de desconfiture,
Que ne fait Mars de son glaiue trenchant.









L VII.

Disoit iadis le bon poëte Homere,
Que Iupiter biens, & mauix cõpensoit
Esgalement, & la liqueur amere,
Auecq' la douce, ensemble dispensoit.
Par ces propos, & tresbeaulx dictz pensoit,
Grande douleur ne se pouoir choysir,
Qu'elle ne fust auecq' quelque plaisir,
Ne grand plaisir sans quelque fascherie.
L'homme n'ha pas tout selon son desir:
Par foys gemist, & par foys fault qu'il rie.








L VIII.

Homme qui ha pour viure à l'auãtaige,
Et suyt la court, pour gloire, & vanité,
Semble au Lyon qui se rend en seruaige,
Qui d'un filet est en captiuité.
Pour peu de cas est en perplexité,
Ou il pourroit en liberté se mettre.
Il ayme mieulx estre valet que maistre:
Combien qu'il peult tost rompre le filet.
En liberté nature le fit naistre:
Mais vain espoir l'arreste, au lieu qu'il est.







LIX.

IL n'est pas temps de iouer aux eschez:
Lors que le feu te brusle ta maison.
Et quãd noz cœurs de douleur sont tachez,
Musique & ieux ne sont pas de saison.
Si nous auons negoces à foison,
Fault qu'aux plus grãd̃z venõs à droite lui-
Il n'est pas tẽps d'en faire la poursuite, (te:
Quand est trop tard, par effectz euidents,
Raison nous ha donnẽ sens, & conduicte,
Pour obuier aux futurs accidents.

I





Al
Ca
Q
Sen
Per
Ma
Ca
V
N



LX.

Q Vi d'une masque entreprend faire
peur
Au fier Lyon, bien petit il avance:
Car le Lyon ha si hault, & gros cœur,
Qu'a l'estonner, fault bien aultre puissance.
Semblablement aucuns par insolence,
Pensent les gents estonner de parole,
Mais tout soudain est acheué leur roolle:
Car leurs effectz ne consonnent aux dictz.
Vaine iactance, & menace friuole.
N'esbahiront iamais les cœurs hardiz.

I ij








LXI,

L'Hõme coupable, ou biẽ, noté de crime,
Se void pareil au Liepure, en tous pro-
Car il aura le cœur pusillanime, (pos:
Et ne pourra dormir de bon repos:
Toujours craïdra que viẽnent les supostz,
Pour le liurer aux mains de la Iustice.
L'homme innocent, pur, & net de tout vice,
Ne craint l'assault des malings, & peruers.
Le Liepure monstre à gents de malefice,
Qu'il leur cõuiët dormir, les yeulx ouuertz.

I iij








L X I I .

AMour apprend les Asnes à dancier,
Et les lourdaulx fait deuenir mu-
Pigner les fait, farder, & agëcer, (guetz:
Par le moyen de ses subtilz aguetz.
Aux endormiz il fait faire les guetz.
Rusticité transmue en gentillesse:
Car sans cela que de son traict les blesse,
Leur vilanie il conuertist en grace.
Symon iadis en receipt telle adresse,
Comme l'on ligt aux escriptz de Boccace.

I iij









LXIII.

Q Vel es' le nom de la presente ymaige?
Occasion se nomme, pour certain.
Qui fut l'autheur? Lysipus fait l'ouuraige.
Et que tient elle? vn rasoir en sa main.
Pourquoy? pourtāt que tout trāche soubdaĩ.
Elle ha cheueulx deuant, & non derriere.
C'est pour mōstrer qu'elle tourne en arriere
S'on fault le coup, quand on la doibt tenir.
Aux talons ha des ailes: car barriere
Quelle que soit, ne la peult retenir.









LXIII.

SVr gresle corps, la teste de Geant
Ne cōvient pas, & soubz grāde stature,
Vn petit chef, y seroit mal seant.
Proportion fait belle la nature.
Tenir ne fault sotte la cr  ature,
Pourtant s'elle ha petite, & ronde teste.
Ne fault tenir l'homme pour grosse beste:
Pourtant s'il ha le chef gros c  me vn Veau:
Mais qu'il y ayt proportion au reste,
Le trop gros chef ne fait pas le cerueau.










LXV.


LE Cypres est arbre, fort delectable,
Droit, bel, & hault, & plaisant en
verdure:

Mais quant au fruiet, il est peu profitable,
Car rien ne vault pour donner nourriture.
Beaucoup de gents sont de telle nature,
Qu'ilz portent tiltre, & nom de grand sciẽce:
Mais s'il aduient d'en faire experience,
L'on ne cognoist en eulx, que le seul bruiet.
C'est grand folie en arbre auoir fiance,
Dõt l'on ne peult cueillir quelque bõ fruiet.







Am
Q
Q
Co
Q
D
A
N
W



LXVI.

PRacticiēs ont les mains pleines d'yeulx,
 Et voyēt cler, quād on leur fait larges-
 Aureilles n'ont: car sont si vicieux, (se.
 Que se fier ne veulent en promesse.
 Qui voudra doncq' euitier leur oppresse,
 Conuiēt qu'aux dōs il ayt tous ses refuges:
 Quand on leur dōne, ilz font p subterfuges,
 Du droiēt le tort, tant de raison foruoient:
 Au tēps present maintz aduocatx & iuges,
 N'escoutent rien: mais prennent ce qu'ilz
 voyent.





C
N
C
P
E
C




LXVII.

L'Hõme constãt est semblable à l'ẽclume,
Qui des marteaulx ne craõt la viõlẽce.
Cœur vertueux, est de telle coustume,
Que de malheur ne doubte l'insolence:
Ne craint fureur, ire, maleuolence,
Contre tous mauux est prompt à resister.
Pour quelque effort ne se veult desister,
De paruenir en honneur, & prouesse.
Constance fait le saige persister
En son entier, & conquerer noblesse.

K







LXVIII.

I Eunesse estant sur vne Boulle ronde,
Ne pèse ailleurs, fors qu'à passer le tēps:
Son siege rond, muable comme l'vnde,
Monstre qu'elle ha ses vouloirs inconstantz.
Les ieunes gents ne sont guieres contents
De trauailler, sinon à leurs desirs:
Leurs voluptez tournent à desplaisirs,
Perte de temps, trop grande s'en ensuyt.
Ieunesse tasche à tous mondains plaisirs,
Sans aduiser que Vieillesse la suyt.

K ij







LXIX.

MAint bõ auteur, græc & latin declaire
Que le Chameau ne boit aucunemēt,
Quelque eau que soit, s'il la voit nette &
claire,

Ains de son pied la trouble expressement.
De nostre temps plusieurs semblablement,
Vrais heritiers de la vieille asnerie,
Ayment plustost la rude barbarie,
Du temps des Gotz, que la douce eloquēce:
Et sont plongez en telle resuerie,
Qu'estre eloquent, reputent à meschance.

K iij









L X X.

Commēt peulx tu nager bien à ton aise,
Chargé de faix, quãd nud te cõvient e-
Trouueras tu iamais hõme, qui s'aise (stre?
A son plaisir, si de son corps n'est maistre?
Si vain espoir te lie en son cheuestre,
Te rendant serf pour honneur terrien:
Qu'est ce apres tout, de ton fait? moins que
Car attendãt quelque bien trãsitoire (rien:
Suyuãt la court, seras plus serf, qu'vn chien,
Et si verras ton espoir frustratoire.

K iij








LXXI.

A Duise bien que le temps ne t'eschappe:
Il ha bonne æsle, & vole agilement.
L'homme rusé subitement l'attrappe,
Et ne le laisse eschapper sottement.
Doncq' employer le fault honnestement:
Car s'il s'en fuit, l'attaindre est impossible,
Et pense aussi qu'il ne t'est pas loysible,
Le consumer en faisant grosse chere:
Si tu le perdz, ne te sera possible,
De recouurer vne chose si chere.








LXXII.

LA Poire verte, aux raidz du chauld
Soleil,

Change de goust, & prend bonne saueur.
Semblablement le ieune, sans conseil,
Auecq' le temps, amende sa fureur.
Le temps corrige, & change toute erreur.
Le temps est chef des bons apprentissaiges.
Ceulx qui sont sotz, il fait deuenir saiges,
Et leurs raisons trouuer belles, & bonnes.
Si le Soleil fait meurir les fruiçtaiges,
Aussi les ans, meurissent les personnes.









LXXIII.

FLateurs de Court tiennent la paste aux
mains,

A tous venants feront des seruiables:
Iusques à tant que par tours inhumains,
Auront saoulez leurs Cœurs insatiables:
Pour se monstrier enuers tous amyables,
Ont grand babil, avecques peu d'effect.
Merueille n'est si leur Cœur contrefaict,
Ha maintes gents reculez en arriere:
Car tousiours ont, par leur vouloir infait,
Langue deuant, & le Cœur en derriere.









LXXIIII.

Pour essayer si le Pot est fendu,
Nous y versons de l'eau à l'adventure,
Non pas du vin: car il seroit perdu,
Si le vaisseau auoit quelque fracture:
Cecy nous donne expresse coniecture,
Que si voulons prouuer vn estranger:
Nous luy dirons quelque secret leger,
Pour bien scauoir s'il est sobre, en langage:
D'un grand secret, serions trop en danger;
S'il aduenoit qu'en parler feust volaige.







LXXV.


SI les Lyons que l'on pend en Affrique,
Font grād frayeur, & peur à leurs sem-
blables:

N'aura pas peur vn gros larron publique,
Ou thesorier, de ses faictz execrables?
Maintz en sont mortz au gibet, miserables,
Et les plus grandz ont commencé la dance.
Gardent soy d'ocq' pour peur de la cadence,
Leurs successeurs, d'estre cõe eulx meschäts:
Car aultrement hault en plaine euidence,
Seront logez, comme euesques des champs.

L







LXXVI.

Q Vand l'hōme fol, à iouer se hazardee,
Pas il ne pense au mal qu'en peult ve-
nir:

Main liberalle, au ieu, qui n'y prend garde,
En pauureté fait l'homme deuenir.

Lier la fault, pour mieulx'la retenir,
Et conseruer le bien en bons vsaiges.

Le ieu met l'hōme en perilleux nauffraiges,
Et bien souuent en mortel desespoir.

Les grās meschefz, & dāgereux passaiges,
Que l'on en void, nous seruent de miroir.

Lij







LXXVII.

Q Vi plus mettra dās le crible d'amours,
Plus y perdra, car chose n'y profite:
Le temps s'y perd, biens, bagues & atours,
Sa douleur est en tout amer conficté.
Folle ieunesse, & franc vouloir incite
A tel desduiēt, despendre grosses sommes.
Sur ce, penser doibuent bien ieunes hommes,
Que de ce fait, meilleurs n'en peuuent estre:
Et quand n'auront le vaillāt de deux pōmes,
Ne sera temps leur erreur recognoistre.

L iij








LXXVIII.

Femmes & nefz ne sont iamais complies,
C'est vne chose ou l'on doibt bien pēser:
Quand on les cuyde auoir du tout remplies,
C'est lors le temps, qu'il faut recommencer.
Vous les pourriez cent fois mieulx agencer,
Qu'à la parfin vous serez à refaire:
C'est grosse charge, & trop peneux affaire,
Voyre plus grand encores, qu'on n'estime.
Heureux seroit, qui s'en pourroit deffaire,
Ou se garder d'entrer en tel abysme.

L iij









LXXIX.

Pour folle amour, les supostz de Venus,
Ont des dangers à milliers & à cents:
Les vns en sont malheureux deuenus,
Aultres en ont du tout perdu les sens.
Plusieurs auteurs en termes condecents,
De c'ont escript exemples d'importance.
Gardons nous d'ocq' de sa folle accointance,
Si ne voulons endurer grandz alarmes,
Car à la fin, soubz feu de repentence,
Voyez amour distiller eau de larmes.









LXXX.

L E fruiçt d'Amours est dur, mol, sec, &
vert,
Leger, pesant, doux, amer, froid, & chauld,
Secret, commun, affable, descouuert,
Triste, ioyeux, cler, obscur, bas, & hault,
L'vn iour present, lendemain en deffault,
Plein de rigueur, abbreuë de mercy,
Rude, amyable, en esbat, & soucy:
Source d'aduerse, & de bonne fortune,
Maigre, & reffait, gresle, gros, gay, transi,
Droict, & tortu, constant comme la Lune.





E
D
T
S
I
N
M




LXXXI.

C Vpido sçait enter iusques au bout,
Et se delecte en fait de iardinaige:
Et, que plus est, son ente prend sur tout,
Dõt est produiçt diuers fruiçt, & sauuaigé.
Tousiours trauaille, & poursuit son ouura-
Sur tous vergers il obtient la regence: (ge:
Il n'est iamais noté de negligence:
Ne lascheté, aumoins qu'on le cognoisse.
Il est expert, & plein de diligence:
Mais en tout arbre ente Poire d'angoisse.











LXXXII.

L'Arbre soustient le Lierre en ieunesse,
Et l'entretient tousiours p son support:
Mais le Lierre estant creu, l'Arbre presse,
Et si l'estrainct par liaysons si fort,
Qu'en peu de temps l'ha rendu sec, & mort:
Vn homme ingrat tousiours aussi meffaiet
A celluy là, qui du bien luy ha fait.
Ingratitude est ainsi sans raison,
Le Lyonneau, en fin celluy deffaiet,
Qui le nourrit, & tient en sa maison:








LXXXIII.

AV temps passé le peuple de Phœnice,
Feit esleuer vne telle figure,
En vne place eminente & propice,
Pour apparoiſtre à toute créature:
Signifiant par icelle paincture,
Qu' prudent est qui soymesme se picque,
Par le Serpent fait en forme sphericque,
Nous en auons expresse demonstrance:
Au monde n'est plus seure thëorique,
Que de soymesme auoir la cognoissance.

M







LXXXIII.

L'Austour pretend de Perdrix faire
proye,
Et bien souuent par les piedz il est prins:
Tel cuyde vaincre, & puis cryer mont ioye,
Qui au combat est le premier surprins.
Maint cœur volaige ha souuent entreprins,
D'auoir pour rien, querelles, & debatx,
Et demander, ou presenter combatx,
Comme trop fol, & plus que temeraire:
Qui à grand honte ha esté mis au bas,
Quand pensoit estre au dessus, de l'affaire.

M. ij







LXXXV,

VN gros canõ chargé de peu de pouldre,
Ne peult poulsier le boulet si auant.
Moulin à voile oncques ne vistes mouldre,
Si d'vn soufflet on luy baille le vent.
Cestuy propos te monstre, & fait sçauant,
Qu'en toute chose il fault proportion.
Nature fait tout par discretion,
Comme maistresse, & mere d'artifice:
L'homme rassis ayant instruction,
Chose impossible, oncques ne meit en lice.

M iij








LXXXVI.

Tout bon Prelat, doit monstrer la lumiere,
Sur le hault lieu, à fin que tous la voyent;
S'ilz ne le font, ne suyuent la maniere
De tout bon droict, ains de raison foruoyët.
Quãd les plus grãds du droict chemin des-
A leurs subiectz donnent occasion (uoyët,
De faire mal, & pour l'abusion,
Seront puniz au respect de leur reng,
Et tomberont en grand confusion:
Car des subiectz Dieu requerra le sang.

M iij








LXXXVII.

EN maint Poëte on treuve mainte fable,
Ayant en soy merueilleuse doctrine:
Prenons en doncq' le bon, & profitable,
Et le mauuais iectons le, comme indigne.
Poëtes ont vne fureur diuine,
Leur eloquence est en tous lieux famée.
Si leur licence est vn peu diffamée,
Pas n'en debuons, pourtant, estre faschez:
Car soubz la fueille en vigne fort ramée,
Les doux raisins, bien souuent, sont cachez.









LXXXVIII.

SI tost se perd(en amours) foy de femme,
Comme l'Anguille eschappe de la main.
Qui plus s'y fonde,entre plus fort en flāme:
Car sa cautelle excede esprit humain.
Maint bon auteur Hebrieu, Græc, & Ro-
main,
En ha d'ẽscript exemples memorables,
Nous recitant que plusieurs gents notables,
Se sont perdus,en si meschant pourchas.
Les femmes sont en caquet tant affables,
Qu'elles nous font prendre Souriz, pour
Chatz.








LXXXIX.

Sile Soleil luyt au droiët de ta teste,
Ton corps rendra nulle, ou bien petite
ymbre:

Si par enuie aduient qu'on te tempeste,
Ta grand vertu te gardera d'encombre:
Vertu reluyt à raidz, qui sont sans nombre,
Annichilant l'obscurité d'enuie.

Maulgré fortune, aura tousiours en vie
Cœur vertueux, honneur, loz, & support:
Et quand viendra que du monde de suie,
Sera viuant en gloire, apres sa mort.









X C.

Lors que l'Oyseau s'enuole de ta main:
Bien difficile en est la recourance:
Lors qu'on profere vne parolle en vain;
Il n'est pas temps d'en auoir repentance:
L'on cognoistra d'un homme l'inconstance;
Par vn seul mot, ou bien simple parole:
Ce que l'un dit, bien tost à l'autre vole;
Souuent en vient grand reproche, & d'ager.
L'homme discret pour bien iouer son roolle;
Se gardera de parler de leger.








XCI.

Quand Bucephal se cognoissoit bardé,
Si fier estoit, que plus ne pouoit estre:
Pour lors aucun ne se fust hazardé
Le cheuaulcher, reserué son seul maistre.
Par ce pourtraict est donné à cognoistre,
Que gents extraictz de quelque race infime,
Si paruenir peuent à grosse estime,
Si fiers se font, qu'on ne les peult tenir.
Quand pauureté monte en honneur sublime,
L'on ne la peult, à peine, retenir.

N







X C II.

PRince qui veult que sa vertu fleuronne,
Et que son bruiet soit en tous lieux famé:
Pour asseurer son sceptre, & sa coronne,
Fault que des siens, il soit crainct, & aymé.
Par ce moyen sera bien reclamé,
Et des subiectz honoré nuit, & iour.
Le Liepure craict, le Chien ha grād amour,
Deux ennemys, ferme paix entretiennent.
Craincte, & amour tiēnent Roys en seiour.
Liepures, & Chiens les corōnes soustiēnent.

N ij







XCIII.

BEndé doibt estre homme qui se marie:
Car qui prend femme au souhaiet de ses
yeulx,
Pour la beaulté, de son sens trop varie,
Dont à la fin est melancolieux.
Les poingz liez doibt auoir pour le mieulx:
Car ne la doibt prendre pour son doüaire.
L'homme est bien fol, & plus que temeraire,
Qui par les maïs ou les yeulx prædra femme
Prædre on la doibt par l'aureille, à biẽ faire,
C'est par bõ bruiet, par bon renom & fame.

N iij







XCIIII.

PVces, & Poulz, les corps mortz abandonnent,

Comme priuez de viure, & de substance.

Semblablement les Flateurs ne s'adonnent,

Fors qu'à ceulx là qui remplissent leur pãce.

Tandis qu'auras biens, honneur, ou cheuãce,

Mille Flateurs auras en ta maison:

Mais s'il aduint que change la saison,

Ou par malheur pauureté te tempeste,

Ilz s'en fuyront de toy comme poyson,

En te laissant tout seul, comme vne beste.

N iij








XCV.

P Ar vn chemin trop fascheux, & esträge,
Si d'auanture aduient que lourdement,
Ton mulet tombe au millieu de la fange,
Dont il ne peult sortir facilement:
Que feras tu? vers Dieu premierement
T'adresseras, implorant son secours:
Mais ce pendant qu'à luy as ton recours,
Metz y la main, auant qu'arrester plus:
Car si premier toymesmes te secours,
Par luy seras secouru du surplus.









XCVI.

PLustost pourras arrester le Daulphin,
Que refrener femme de cœur volaige.
Combien que soit l'homme subtil, & fin,
Esprit de femme est ruse d'auantaige.
Femme ne veult estre tenue en caige,
Tousiours pretend à vsurper franchise.
Quand le mary la cuyde auoir submise
A son vouloir, pensant en estre maistre:
En luy donnant du vent de la chemise,
L'aura soubdain bridé, de son cheuestre.









XCVII.

TAnt plus des piedz le saffran est foulé,
Plus il florist, & croist abondamment.
Cœur vertueux tant plus est affolé,
Et plus resiste à tout encombrement.
Vertu se preuue en mal plus qu'aultrement,
Elle florist en temps d'aduersité:
Si par malheur elle ha perplexité,
Lors elle fait plus forte resistancé.
Tant plus l'homme est en douleur concité,
Plus ha besoing du pauoys de Constance.









XCVIII.

Q Vi veult appredre à dur entendemēt,
De desespoir ne se voyse faschant:
Mais veoye l'Ourse, & regarde comment;
A ses faons donne forme en leschant.
Tout bon sçauoir se treuue en le cherchant:
Par artifice on ha ciuilité:
L'esprit humain par imbecilité,
Des sa naissance est mal instruiet, & rude:
Mais l'on polit telle brutalité,
En luy baillant doctrine par estude.







XCIX.

Quand Hercules, apres plusieurs con-
questes,
Cuydoit auoir repos de ses labeurs:
Hydra suruint avecques ses sept testes,
Renouuelant ses trauaulx, & malheurs.
Quand par vertu auons acquis honneurs,
Pensant auoir tousiours paix assouuie:
Quelque meschant suruiendra par enuie,
Pour nous donner plus que deuant affaire.
Tel trauail n'eut Hercules en sa vie,
Ne tel danger, que pour Hydra deffaire.

○







C.

EN ce pourtraict on peult veoir diligēce,
Tenant en main le cornet de copie.
Elle triumphe en grand magnificence:
Car de paresse oncq' ne fut assoupie.
Dessoubz ses piedz tient famine accroupie,
Et attachée en grand captiuité:
Puis les formis par leur bastiueté,
Diligemment tirent le tout ensemble:
Pour demonstrier qu'auецq' oysiueté,
Impossible est que grādz biens l'on assemble.

O ij






Deliure moy, sei-
gneur, des ca-
lumnies des
hommes.


F I N.



The page is framed by an elaborate, symmetrical decorative border. At the top center is a circular medallion containing a face, flanked by two winged figures. The sides of the border are filled with intricate scrollwork and floral motifs. At the bottom, two figures are depicted in circular frames, each holding a scroll. The entire design is rendered in a classic woodcut style.


Imprimé à Paris par Denys Iano-
not, Imprimeur & libraire,
demourant en la rue neufue
nostre Dame, à l'enseigne
sainct Iean Baptiste pres
saincte Geueniesue des Ar-
dents.

Pat ere, aut abstinē.





Nul ne sy froite.











57







SPECIAL 93-B
N 8697
7740
L59
154E

GETTY CENTER LIBRARY

Lisa Leonard Bakun.
1972

